

錦繡萬花谷

八

舊刊錦繡萬花谷

十冊

錦繡萬花谷卷之六

西京

藝祖誕聖

西京應天寺本後唐夾馬營大中祥符二年以太祖誕聖之地建寺銘名後奉祖宗神御揮塵錄

五相隣居

西洛有五相隣居詩賡和文潞公富韓公弼王相二張相也故諺云吾鄉有宰相坊青瑣

襄陽

峴山

襄沔記云峴山高五百步東臨漢水上有羊祜碑

漢武帝壇南雍州記

揚州

吳公臺

揚州吳公臺以陳吳明徹得名在江都縣西北四里雷塘在縣東北十里隋煬帝葬吳公臺下後唐平江南改葬雷塘

竹西亭

杜牧題禪智寺誰知竹西路歌吹是揚州後人因立竹西亭

二十四橋月

杜牧之寄揚州人詩云二十四橋明月夜一作



人何處教吹簫山谷又云淮南二十四橋月馬上
時時夢見之想得揚州醉年少正圍紅袖寫烏絲

三十六英雄

揚行密起合肥所與起事者劉威陶雅之徒號三

十六英雄後都揚州 徐溫傳

甓社湖珠

嘉祐中揚州有一珠甚大初出于長天縣陂澤中
後轉入甓社湖後又入新開湖中九十餘年常常
見之珠大如拳爛然不可視十餘里間林木皆有
影如日初照 沈中存筆談

玉蘂花

揚州后土廟有瓊花一株潔白可愛俗目為瓊花
不知何木也孫冕鎮維陽訪之山中甚多但苦樵
斧野燒故木不得大遂不為人所貴或云乃李文
饒所賦玉蘂花也 瀨水燕談

戲馬賞心

唐李蔚鎮淮南見郡寡勝遊之地命於戲馬亭西
連玉鈎斜葺亭名曰賞心亭以備遊宴 桂苑叢談

蜀江

淮南蜀江者維揚之地也或曰勢連蜀或以產茶
味如蜀茶云自蜀江之南有竹西亭脩竹踈翠後
即禪智寺也 古今詩評

黃州

隋永安郡

隋書地理志黃州乃永安郡今州東十五里有永安城俗謂之女王城其說甚鄙而圖經以爲春申君故城亦非是春申君所都今無錫惠山有春申君廟

志林

棲霞樓

在黃州

竹樓

王元之有竹樓賦

赤壁

黃州守居之數百步爲赤壁或言周瑜破曹公處不知果是否斷崖壁立江水深碧二鵲巢其上風浪靜輒乘小舟至其下

志林

潭州

隋平陳改湘爲潭州

長沙郡禹貢荊州之域春秋戰國時爲黔中地之南境晉懷帝永嘉元年分荊州置湘州隋平陳改湘爲潭州史記天官書曰翼軫爲楚分旁一小星爲長沙星

十道志

橘洲

張舜民南遷錄橘洲在湘州南北與州城等又詩

注秦少游死藤州其子護喪藁殯潭州魯直有詩
云長眠橘洲風雨寒謂此

山谷詩注

蒸池

寰宇記衡陽縣吳之臨蒸以蒸水名老杜詩衡岳
江湖大蒸池疫癘偏今在潭州又后山寄潭州詩
宣室來何暮蒸池得借留

定王城賈傳井

杜詩不見定王城舊處長懷賈傳井依然即長沙
定王湘州南寺之東有井即賈誼宅有井小而深
上斂下大狀如壺今為陶侃廟

三絕

長沙人咤吾州有三絕天下不可及
貓頭笋一枚
重秤鐵黑潭取魚一網踰千斤
巨艦漕米一船萬石

倦遊錄

衡州

衡山為郡

衡陽郡春秋屬楚秦屬長沙郡為鄱縣地屬長沙
三國吳分長沙之東部立為湘東郡隋平陳改為
衡州以衡山取名甄烈湘州記大明中望氣者云
東有天子氣遣日者巡視斬山岡以厭之遂乃湘
東王為天子即明帝也

道州

唐置州

十道記江華郡禹貢荊州之域春秋戰國時屬楚漢屬長沙唐貞觀八年爲道州圖經曰昔舜封象有庠國即其地

永州

永水名郡

十道云零陵郡禹貢荊州之域及春秋戰國時屬楚之南境秦屬長沙郡晉以零陵屬湘州隋平陳置永州因永水爲名甄烈湘州記石燕山石形似燕大小如一山明淨則頡頏飛翔羅含郢中記石燕在泉陵縣雷風則群飛然土人稀有見者

愚溪

柳子厚愚溪詩序曰瀟水之陽有漢焉東流入瀟或曰冉氏嘗居之故姓是溪爲冉溪余以愚觸罪謫瀟水上愛是溪入二三里得其尤絕者家焉更名之爲愚溪

浯溪

陶岳零陵記曰浯溪在永州北水路一百餘里唐上元中容管經畧使元結罷任居焉謂溪世無名爲自愛之故名溪曰浯溪山曰浯峯亭曰浯亭意取其獨有也因刻中興頌在旁

瀟水

永州有地名鼻亭窮崖絕徼非人迹可歷其下乃
瀟水俗謂之麻灘岸有廟即象祠也孟子曰舜封
象於有庠所以富貴之也

倦遊錄

朝陽巖

元結朝陽巖序曰零陵郭中有水石之異泊舟尋
之得岩與洞以其東向遂以朝陽名之

淡山巖

零陵摠記云淡山巖在永州西南其地宜淡竹故
黃有詩云去城二十五里近天與隔盡俗子塵謂
此

故人亭

梁柳惲詩汀洲採白蘋日晚江南春洞庭有歸客
瀟湘逢故人後因於瀟湘水合處立故人亭

郴州

隋置郴州

十道志桂陵郡禹貢荊州春秋戰國時屬楚秦屬
長沙郡漢高祖二年分長沙南境立桂陽屬荊州
梁元帝改爲廬陽郡屬衡州隋平陳改爲郴州史
記項羽遷義帝長沙都郴

邵州

以邵名山

十道志邵陽邵禹貢荊州春秋屬楚秦爲長沙郡

漢爲昭陵縣屬零陵郡吳分零陵北部爲郡邵陵屬荆州即今州也晉武改昭陽爲邵陽唐貞觀十年改爲邵州

荆南

九十九洲

江陵先有九十九洲古老相承云洲蒲百當出天子桓元之爲荆州刺史內懷逆心乃遣鑿破一洲以應百數隨即崩散宋文帝爲宜都王在藩一洲自生俄而文帝紹統後遇禍此洲復沒太清末枝江合浦復生一洲明年梁元帝即位帝太清初爲荆州刺史至承聖末其洲與大岸相通惟九十九洲云魏師圍荆州虜元帝去

呼鷹臺

劉表爲荆州牧築臺名呼鷹乃作野鷹來曲坡詩云莫上呼鷹臺平生笑劉表

息壤

江陵南門之外甕門之內東垣下有小瓦堂室一所高三尺許詢其州人曰此息壤也鞠其由數百年前此州忽爲洪濤所沒未沒者三二版州帥惶懼有書生博讀甚廣召問之曰此是息壤也息壤記曰禹湮洪水茲有海眼泛之無常禹乃鑄石造龍之宮室寘于穴中以塞水脉後築此城毀其舊

制是以有此患請掘而求之果得石室已損荆帥
於是以此息壤培之其水始絕今於其上起屋以法
其所也 玉堂閑話

柏堂畫

渚宮故事天皇寺柏堂有張僧繇圖盧舍那佛夜
有奇光發屋唐閻立本嘗觀舊迹明日往又明日
往留宿其下十餘日不能去

鄂州

黃鶴樓

李太白詩我且爲君推碎黃鶴樓君亦爲我倒却
鸚鵡洲坡詩黃鶴樓前月蒲川意起於神異

鸚鵡洲

寰宇記在鄂州江夏縣黃山谷詩鸚鵡洲前弄明
月李誥君亦爲我倒却鸚鵡洲蓋黃祖殺禰衡處

陶公柳

坡詩連山蟠武昌翠木鬱樊口空傳孫郎石無復
陶公柳注陶侃嘗課諸營種柳都尉夏施盜植之
已門後侃見問曰此武昌西門柳何故盜種此施
服罪 陶傳

菩薩泉

寰宇記樊山在鄂州武昌縣西山東十步有岡岡
中有東溪東坡序曰寒溪少西數百步則爲西山

寺有泉色白而甘號菩薩泉李常侍謂予豈昔阿育王所鑄文殊金像所在乎

怡亭

歐公集古錄曰怡亭銘在武昌江中有小島亭在其上刻于島石李冰陽篆裴虬撰

南樓

庾亮在武昌諸佐吏乘秋夜共登南樓亮至諸人將避之亮曰少俟老子於此興復不淺黃有詩寄方公悅云江東湖北行畫圖鄂州南樓天下無庾公風流冷似鐵誰其繼之方公悅

赤壁

周瑜與曹公遇于赤壁瑜部將黃蓋取蒙衝鬪艦實以薪草裹以帷幕欺以欲降蓋放火諸船同時火發延燒岸營曹公敗退

吳志周瑜傳

兩赤壁

山谷詩注鄂州蒲圻縣有赤壁山黃州亦有之東坡作赤壁前後賦序云黃州少西山麓斗入江石色如丹又賦云南望武昌西望夏口蓋指黃州者是

山作八字數不及九

戴詳言於庾亮曰武昌土地有山無林政可圍始不可居終山作八字數不及九昔吳用壬寅來上

創宮城至巴酉還下秣陵陶公亦涉八年土地盛衰有數人心去就有期不可移也公宜更擇佳處不可久住

晉方枝傳

岳州

以羿屠巴蛇名郡

十道志巴陵郡禹貢荊州之域古三苗國地春秋及戰國時屬楚秦屬長沙郡晉分長沙之巴陵爲建昌郡齊武封子倫爲巴陵王隋平陳改爲岳州潯江記曰羿屠巴蛇於洞庭其骨若陵故曰巴陵十道志曰巴陵縣本漢下雋縣之巴丘之地

辰州

開皇改置州

十道志黔中郡禹貢荊州之域戰國爲黔中秦昭王伐楚置黔中郡漢武陵郡之酉陽縣也武陵五溪蠻之西界也周武帝保定四年蠻帥田思鶴以地納附置奉州建德三年改爲黔州吳錄曰黔陽屬武陵郡今辰州三亭縣西故城是也又十道志辰州廬溪郡禹貢荊州春秋屬楚其地即古蠻夷之地秦昭王使越伐楚畧取蠻夷置黔中郡漢改黔中爲武陵郡隋開皇平陳改爲辰州沅陵記曰五溪十洞頗爲邊患自馬伏波征南之後雖爲郡縣其民叛擾或有之蓋恃山險所致十道志曰壺

頭山後漢馬援征五溪蠻取壺頭山城乘高守險水迅船不得進士卒多死援亦中病穿岸為室以避炎氣遂卒武陵記曰山邊有石窟馬援所穿室也內有大蛇如船云援之餘靈又曰楚子滅巴巴子兄弟五人流入黔中漢有天下名酉辰屯武沅等五溪為一溪之長故號五溪

沅州

沅江水名郡

十道志沅江舊叙州潭陽郡古蠻夷之地戰國為為楚黔中地唐貞觀八年為巫州天授二年以巫山不在州界改為沅州以沅江水為郡名開元十三年仍舊為巫州大曆五年為叙州五溪記民多射生而鼻飲噉蛇鼠捕蝦蟹朝營夕用故無宿給

靖州

舊以富水為富州

十道志富州開江郡秦桂林郡也二漢屬蒼梧郡梁為開江武城二郡陳置靜州改開江武城二郡為逍遙郡隋平陳並廢唐又置靖州貞觀八年改為富州因富水為名

成都

宋武伐蜀之謀

宋武帝與朱齡石密謀伐蜀譙縱帝曰劉敬瑄往

年出黃武無功而退賊謂我今當外水往而料我當出其不意猶從內水來也必重兵守涪城以備內道若向黃武正墮其計今以大衆自外水趣成都疑兵出內水此制敵之奇也別有函封付齡石至白帝乃開曰衆軍悉從外水取成都臧熹朱攸於中水取廣漢使羸弱乘高艦十餘由內水向黃武譙縱果備內水齡石至彭模斬其將侯畔縱奔巴西巴西人斬之

南史齡石傳

蠶叢啓國之誓

老杜石筍行云君不見益州城西門陌上石筍雙高蹲古來相傳是海眼苔蘚食盡波濤痕雨多往往得瑟瑟此事恍惚難明論恐是昔時御相基立石爲表今仍存注成都子城西金容坊有石二株挺然聳峭高丈餘耆舊傳云其名有六曰石筍曰蜀妃閨曰沉犀石曰魚鳧仙壇曰西海之眼曰五丁石門皆非也圖經云乃前秦寺之遺址諸葛亮掘之方驗有篆字曰蠶叢氏啓國誓蜀之碑以二石柱橫埋連接鐵其中一南一北無所偏邪又五字濁歎燭觸蠲時人莫曉後蜀相范賢議曰亥子歲濁字可記主水災寅卯歲歎字可記主飢饉巳午歲燭字可記主火災辰觸字可記主災申酉歲蠲字可記主稼穡富贍悉以年事推應驗

符響

浣花溪

梁益記溪水出湔江居人多造綵牋故號浣花溪
老杜別館在焉後為崔寧宅捨為寺今尚在杜詩注

錦宮城

錦宮城畔栢森森注成都府城亦呼為錦宮城以
江山明麗錯雜如錦也杜詩

萬里橋

華陽乃成都倚郭縣名東有萬里橋諸葛亮送吳
使至此曰萬里之行自此始也蜀志

七星橋

華陽記蜀守李冰造七星橋上應七星杜詩注

濯錦江

成都記濯錦江丞相張儀所作笮橋東下枕水此
水濯錦則鮮明他水則不能又有虹橋杜詩注

散花樓

唐成都府有散花樓河中府有薰風樓綠莎廳鄭
州有夕陽樓李學士家談

錦里

成都記錦里城呼為錦城以江山明麗錯雜如錦
故也杜詩注

龜城

秦惠王遣張儀取蜀以龜之行迹築城謂之龜城
殷文圭集注

錦城

卅說成都州城皆種芙蓉至秋盛開望之若錦故
號錦城 杜詩注

畫廳

淳化中李順亂蜀張乖崖鎮蜀日郾西有堂屏乃
黃筌畫雙鶴花竹名曰雙鶴亭南壁乃黃氏畫湖
灘山水雙鷺冠於兩川賊平公自置畫為一堂名
曰畫廳 湘山野錄

少城

杜詩東望少城花蒲煙注少城小城也在城西張
儀所築 詩注

石犀

秦李冰為蜀太守立石犀五頭以厭水精後轉為
牛一在石牛門一在淵中又作三石人立水中與
江神要水竭不至足盛不沒有又鑿平水道水神
怒水乃操刃入水乞神闔迄今蒙福 杜石犀行注

福州

唐開元為福州

圖經曰勾踐六代孫為楚所併其後有無諸以境
內南泉山之地因而都之稱閩越王弟餘善至孫

繇又以東越隅之地稱越王皆是會稽之域遂有三越之稱十道志福長樂縣亦閩越地秦為閩中高帝立無諸為閩越王都於此晉置晉安郡陳置閩州唐開元十三年為福州開元錄閩州越地即古東甌今建州亦其地皆蛇種有五姓謂林黃等是其裔郡國志漢元鼎六年立都尉居侯官以禦南越所謂東北一尉西南一侯也

望海亭

蔡君謨守福州李泰伯訪之一日命泰伯陳烈早膳於望海亭膳罷籍妓鬻酒後亭斂袂聲喏而過蔡遂留之旋命觥具方歌一拍陳怖駭越墻攀木而遁泰伯即席賦詩云七閩山水掌中窺乘興登臨至落暉誰在畫簾沾酒處幾多喧擗赴潮歸晴來海色依稀見醉後鄉心積漸稀山鳥不知紅粉樂一聲檀板便驚飛

湘江野錄

中官區藪

唐時諸道歲進閩官號白閩嶺尤多後皆任事當時謂閩中為中官區藪

建州

以建溪名郡

興化建安郡古閩越之地秦閩中郡漢屬會稽吳為建安郡陳屬閩州隋平陳屬泉州武德四年置

建州因建溪爲名方輿志浦城縣本漢東侯官之北鄉也吳永安三年改爲吳興縣圖經晉尚書陸邁梁尚書郎江淹皆爲吳興令淹自序云吳興在東南嶠外閩越之舊境是也

十道志

武夷北苑壑源沙溪

北苑壑源沙溪皆造茶之處北苑官焙也歲貢爲上壑源私焙也爲次沙溪外焙也爲下東坡詩云帝規武夷作茶圃山爲孤鳳翔且嗅胡仔云余至富沙按其地武夷在富沙之西隸崇安去建安二百餘里北苑在富沙之北隸建安去城二十五里即與武夷相去遠甚武夷未嘗有茶茶之精者乃在北苑自有一溪南流至富沙城下方與武夷水合流東去其言帝規武夷作茶圃者非也又以武夷山爲鳳皇山故有山爲孤鳳翔且嗅之句北苑茶山乃鳳皇山也方悟東坡爲人所誑鳳味硯必是劔浦黯淡灘石

茗溪詩話

泉州

唐景雲二年置州

十道志清源郡秦漢土地與長樂同晉南渡衣冠族多萃其地以求安堵立晉安郡宋齊以後因之唐自景雲二年置泉州天寶初爲清源郡

漳州

漳浦水名郡

十道志漳浦郡歷代土地長樂郡同唐分其地為
漳州郡國志梁山有漳浦水一云漢水

汀州

郡名為州

十道志臨汀郡歷代土地與長樂郡同唐開元二
十年置汀州初在雜羅縣以其地瘴居者多死大
曆後移理長汀白石村

興化

壺公山

興化有識云壺公山若斷莆田朱紫半水繞壺公
山此時方好看蔡君謨興水利引水繞壺公山登
第者在朝朱紫半矣搜神祕覽

廣州

五羊

昔高固為楚相五羊街穀至其庭因以五羊名其
地六國時廣屬楚故也廣州記

鬼工築城

魏籙侍郎知廣州子城一角忽頽一古磚有四大
字云委於鬼工是魏字公感其事大築新之罷還
未幾儂寇廣州外城一擊而圯獨子城堅民賴以
生賊平以公有前知之備加諫議大夫再知五羊

公以築城之功自論久不報作感懷詩內云螭頭
賜對恩雖厚雉堞論功事已空文潞公採詩呈加
龍圖閣學士尹應天府 古今詩話

蚬子蠻婢

丘濬詩碧睛蠻婢頭蒙布黑面胡兒耳帶環幾處
樓臺皆枕水四周城郭半圍山 又街上腥臊堆
蚬子口中膿血吐攢擲又風腥蠻市合日上瘴雲
紅又丁謂詩梅花過嶺路挑葉渡江舡

夢燈

廣守數人連卒多見夢燈後段公作守夢燈遍郡
城以爲憂未幾果九十日卒 見聞錄

海神廟

唐天寶十載封南海神爲廣利王廣州之東南海
道八十里扶胥之口黃木之灣嘗以立夏氣至祝
冊自京師至命刺史行事祠下事訖驛聞當祀時
海常多大風將往皆憂戚故嘗以疾爲辭委其副
韓碑云號祝融廟

經過城門得三千萬

卅云廣州刺史但經城門一過便得三千萬 謝琨傳

貧泉

州北二十里名石門有水曰貧泉飲者懷無厭之
欲吳隱之爲廣州刺史至泉所飲之賦詩曰古人

云此水一畝懷千金試使夷齊飲終當不易心傳

韶州

以韶石名州

十道志始興郡禹貢揚州春秋戰國時皆楚地秦屬南海郡二漢屬桂陽郡吳置始興郡宋改為廣興齊復為始興隋平陳為韶州以韶石為名郡國志曰韶州科斗芳水間有韶石二狀雙缺永嘉二年有飛仙衣冠遊二石上舜昔登此石奏韶奏因以名之

循州

以趙佗所蒞名州

十道志海豐縣郡春秋時北越之地戰國屬楚秦二縣屬南海郡隋平陳置循州南越志郡東水道千里趙佗昔為龍川尉所蒞此

潮州

郡名為州

十道志潮陽郡亦古閩越地秦屬南海郡秦末屬尉佗漢初屬南越後亦屬南海郡後漢因之至晉置東安郡隋平陳置潮州郡國志稻再熟蠶亦五收黃海為鹽十道志海陽縣本漢揭陽縣南越志潮陽縣窮海之北故曰潮陽

連州

黃連山名郡

十道志連山郡春秋楚地秦爲沙郡之南境二漢爲桂陽郡之桂陽縣吳屬始興郡宋立永安郡梁爲陽山郡唐武德四年改爲連州以郡南黃連山爲名

恩州

郡名爲州

十道志恩平郡秦屬南海郡二漢爲合浦縣唐貞觀中置恩州

端州

隋置郡

十道志高要郡秦屬南海二漢屬蒼梧郡陳置高要郡隋平陳置端州南越志曰石室山旁洞雲霧自生風煙有二石門以爲神仙之下都

新州

以郡名爲州

十道志新興郡古越地秦始皇畧取陸梁地置象郡今州即其地也漢爲合浦之臨元縣晉穆帝永嘉七年分蒼梧郡於此置新寧郡梁隋唐爲新州封州

故以風而爲州

十道志岡州義寧郡禹貢揚州秦漢並屬南海郡

東晉末分置新會郡隋平陳置封州後改爲亢州後改爲岡州郡國志岡州近大海晴少雨多遇大風樹木悉拔俗織竹爲釜蠟殼屑泥之煮鹽轉火彌密

靜江

陽朔碧蓮峰

桂州山皆平地拔起數百丈竹木翁鬱石如黛染陽朔縣尤佳四面峯巒駢立故沈彬題詩曰陶潛彭澤五株柳潘岳河陽一縣花兩處爭如陽朔好碧蓮峰裏住人家

青箱雜記

容州

以容山名州

方輿志普寧郡古越地秦屬象郡二漢屬合浦郡宋太始七年分合浦縣於此立南流郡唐武德四年置銅州貞觀八年改爲容州因容山爲名十道志鬼門關在北流縣南三十里兩石相對狀若關形闊三十餘步昔馬援討林邑經此立碑尚存昔人趨交趾皆繇此關南尤多瘴癘去者罕得生還故諺曰鬼門關十去九不還郡國志斯地瘴氣春謂青草秋謂黃芑飲江水皆得之

邕州

貞觀六年置州

十道志邕州朗寧郡古越地秦為桂林郡漢為鬱林郡又為鬱林之嶺方縣晉置晉興郡於此隋為鬱林郡之宣化縣武德四年置南晉州貞觀六年改邕州圖經曰人俗儉嗇澆薄內險外瘁推髻跣足尚雞卜卯卜

融州

郡名為州

十道志融水郡歷代土地與柳州同唐置融州
潯州

郡名為州

十道志潯江郡秦屬桂林郡二漢已後屬鬱林唐置潯州郡國志曰大賓縣漢布山縣有唐牛與虵同穴牛嗜鹽俚人以皮裹手塗鹽入穴採之牛舐之出外則不得入取其角為器一曰糖牛

鬱林州

郡名為州

鬱林郡秦為桂林郡漢改為鬱林郡梁置定州後改為南定州隋平陳改丑州唐復為崖州

賀州

以賀水為州

十道志臨賀郡秦屬南海二漢屬蒼梧郡吳分置臨賀郡宋為臨慶郡齊復為臨賀郡隋平陳置賀

州因賀水爲名

昭州

以昭漳名州

十道志本平樂郡秦桂林即其地二漢屬蒼梧郡齊屬始安郡唐武德四年置樂州唐貞觀八年改昭州取昭潭爲名盛弘之荊州記平樂縣西南數十里有巖其間有兩目如人眼極大瞳子白黑分明因名目巖

柳州

貞觀八年改柳州

十道志柳州龍城縣秦漢土地與象州同晉以後屬桂林郡隋屬始安郡貞觀八年改柳州

賓州

安城郡

十道志安城古越地秦屬桂林漢屬鬱林郡

藤州

隋平陳置州

十道志感義郡秦屬南海郡二漢合蒼梧郡晉爲永平郡隋平陳置藤州郡國志俗以青石爲刀劍如銅鐵婦人亦以爲環玦代珠玉也夷人往往化爲獮小虎也

象州

郡名爲州

十道志象郡秦屬桂林郡二漢爲鬱林郡隋平陳置象州因象山以爲名注秦之象郡合浦縣郡非此象州也

雷州

大海多雷名州

方輿志海康郡秦象郡地二漢以後並合浦郡梁置合州大同末爲南合州煬帝廢之唐爲雷州南濱大海多雷雷之聲近在簷宇之上雷州之北高州之南數鄉亦多雷雷之聲似在尋常之外俗俟雷時具酒肴設奠法甚嚴謹有以羸肉與雞肉食者霹靂即至

高州

郡名爲州

十道志高涼郡秦已前土地與康州同二漢屬合浦郡吳置高涼郡梁置高州隋平陳廢郡而高州如故

梧州

舜葬蒼梧

十道志蒼梧郡秦屬桂林郡二漢爲蒼梧梁屬成州隋平陳改封州爲梧州漢書武帝元始六年開蒼梧郡禮記舜葬於蒼梧之野

欽州

隋平陳改為州

十道志寧越郡與容州同宋齊以來置宋壽郡梁又置安州隋平陳為欽州

貴州

唐置貴州

十道志懷澤郡虞舜暨周並為荒裔秦為桂林郡漢已下與鬱林同唐置州

桂州

多生桂名州

十道志始安郡禹貢揚州春秋時越地秦始皇二十三年嘗發逋亡之人贅婚賈人略取陸梁是為桂林郡焉二漢屬零陵蒼梧二郡吳分置始安郡晉孝武改為始建梁天監六年立桂州於蒼梧鬱林之境無定理處大同六年移於今理隋大業罷州唐武德四年復置州始定吳越之境其人好劍輕死火耕水耨人食魚稻無千金之家好巫鬼重淫祀十道志臨桂縣荔水源多生桂桂生處無雜木也

廉州

以廉化人得州名

方輿志廉州合浦縣秦象郡地漢為合浦郡之高

梁縣隋於此置簡州又改為緣州唐改為橫州去合浦八十里有圍州其地產珠古城在古廉州西南即孟嘗為太守還珠之處

瓊州

郡名為州

方輿志瓊山郡土地與朱崖郡同唐貞觀六年分崖州置瓊州

昌化軍

郡名為軍

十道志儋州昌化郡土地所屬與朱崖同漢元鼎六年定越地置儋耳郡唐武德四年置儋州漢書

張注云鍤其耳分令下垂為飾即儋耳也

萬安軍

郡名為軍

十道志萬安軍萬安郡土地與朱崖郡同唐置萬安州或為萬安郡

崖州

郡名為州

十道志朱崖郡海中之洲也洲方千里與今海康郡之徐文縣對自徐文徑渡便風揚帆一日一夕即至梁置崖州郡國志曰崖州婦人著絲纒以土為釜器用甗瓢無水人飲石汁又有椒以安石櫛

花着甕中經旬即成酒其味香美甚醉人
諸郡名

兩浙道院淮南道院

江陰軍北阻大江地僻鮮將迎之煩公事絕少通
州南阻江東北瀕海訟稀事簡士大夫謂江陰為
兩浙道院通州為淮南道院 鍾水筆談

節度軍州名

建康軍 建康府

護國軍 河中府

求興軍 京兆府

成德軍 真定府

天雄軍 大名府

武安軍 徐州

泰寧軍 兗州

保平軍 陝州

昭德軍 潞州

威武軍 福州

寧海軍 杭州

鎮東軍 越州

安遠軍 安州

彰武軍 延州

鎮南軍 隆興

武昌軍 鄂州

寧江軍 夔州

寧武軍 利州

清海軍 廣州

定難軍 夏州

鎮海軍 青州

天平軍 鄆州

彰信軍 曹州

安化軍 密州

鎮安軍 陳州

忠武軍 許州

武勝軍 鄧州

武成軍 滑州

保康軍 房州

奉寧軍 鄭州

昭化軍 金州

淮康軍 蔡州

永清軍 其州

定武軍 定州

鎮康軍 檀州

建雄軍 青州

定安軍 邢州

永安軍 府州

彰德軍 相州

橫海軍 滄州

鎮西軍 麟州

定國軍 同州

鎮潼軍 華州

威德軍 耀州

靜難軍 邠州

彰化軍 涇州

保大軍 鄆州

雄武軍 秦州

保信軍 廣州

忠信軍 壽州

集慶軍 亳州

寧國軍 宣州

昭信軍 贛州

平江軍 蘇州

鎮江軍 潤州

泰國軍 明州

昭慶軍 湖州

保寧軍 婺州

武安軍 潭州

平海軍 泉州

建寧軍 建州

武信軍 遂州

安德軍 閩州

武康軍 洋州

武泰軍 黔州

靜江軍 靜江

建寧軍 邕州

寧遠軍 容州

崇信軍 隨州

順昌軍 穎州

忠正軍 壽州

保靜軍 宿州

武平軍 鼎州

安靜軍 梓州

總地里

鬼門關崑崙關

桂嶺九驛至象象南左右分兩歧皆適二百里而阻山南北十餘埃攢峯疊嶂萬仞蔽天中鑿險道而度號曰關右岐由賓而之邕交曰崑崙關左岐由貴鬱林而之雷瓊曰鬼門關遷客流人遠投海表生還者稀

彬江集

山東

古所論山東乃今之河北晉地今所謂山東乃古之齊地青齊是也謂之山東蓋太行山之東也

詩坡

曹溪口水香

梁大監中有婆羅門智樂者南遊至曹溪口掬水聞香云此必勝地可建道場後六祖果來此住遂建南華寺今屬韶州

陵井監

天師張道陵居鶴鳴山行正一盟威之法一日有美女十二列於庭曰願為箕箒妾道陵知陰神十二時之直乃謂之曰汝等何以為獻女各出玉環一枚為贄道陵曰難以併納吾將十二環作一環投入地有得者納之道陵取環投地淪成一深井玉女皆脫衣入井探環井深五百七十尺環不可得出井取衣已為天師所匿眾女泣下天師乃令

玉女居於井中至唐末王建為盜昏見一裸體婦人迫之不能及以刀刺之如中鐵石忽長丈餘目若電光猝建之髮擘而南去或在虛或在地至曉約三百里置王於地其形復為女子曰我欲碎爾為齏粉為爾當為吾國之土地主當改心易行富貴至矣及平巢賊李茂貞難運遂有功梁祖開國王乃僭位遣人於鹽井致醮玉女出半面享之初天師以地荒梗不可耕乃因玉女遂化鹽井以救窮民今陵井是也取天師之名故曰陵井

雲齋廣記

黃牛峽

杜詩云白狗峽黃牛山山在縣北高三十一里有石如人負力牽牛人黑牛黃行者歌曰朝發黃牛暮宿黃牛一朝一暮黃牛如故曰白狗斜臨北黃牛更在東

白帝城

夔州有白帝城公孫述所名在魚復縣劉備改曰永安宮去夔州十里故杜詩云白帝夔州各異城

詩注

盤屋二曲

鳳翔府有盤屋縣長安志云山曲曰盤水曲曰屋故曰二曲

樂史寰宇記

七盤澆雷之故

王莽命王級曰澆雷之固南當荆楚注四面阨塞其道屈曲溪谷之水回澆而雷也今之商州界七盤十二澆是也

莽傳

白門樓

下邳城南門謂之白門樓曹公擊呂布布登白門樓兵圍之急乃下降

布傳

琅邪臺

在沂州之沂水海州之朐山密州之諸城三縣界先是越王勾踐嘗治此秦始皇登山樂之作琅邪臺其地在今諸城之東南

坡詩注

黃樓

熙寧十年河決澶淵水及彭城下子瞻為彭城守率禁卒登城捍水即城之東門為大樓堊以黃土土勝水色黃故以為名子瞻詩云我生黃樓上欲作黃樓詩忽得故人書中有黃樓詞黃樓高十丈下建五丈旗楚山以為城泗水以為池

坡集

漾陂

杜詩有漾陂行士大夫多讀為蕩漾之漾此字從水從美以彼中有魚極美得名

坡詩注

鑿杜固

唐杜正倫與城南諸杜系遠來同譜不許諸杜所居號杜固世傳其地有壯氣故世衣冠正倫建言

鑿柱固通水利既鑿川流如血自是南柱稍不振
正倫傳

錦繡萬花谷卷之六



